

Berani laksana perubahan demi rapatkan jurang digital

Ekonomi digital antara agenda utama Malaysia bagi mencapai pembangunan sosioekonomi inklusif, mampan dan bertanggungjawab.

Secara amnya, ia merujuk aktiviti dan urus niaga didorong sektor awam dan swasta serta warganegara untuk menghasilkan, mengadaptasi dan menjalankan inovasi teknologi serta perkhidmatan digital berkaitan fungsi sosioekonomi.

Ia juga dilihat sebagai pemangkin ke arah peningkatan produktiviti dan kualiti hidup lebih menyeluruh.

Ekonomi digital antara merencanakan pertumbuhan ekonomi negara. Ia berperanan sebagai faktor penarik kepada pelabur asing menjalankan perusahaannya mereka di pasaran Malaysia.

Pelaburan asing antara sumber utama pembangunan negara. Kemasukan pemodal asing bukan sahaja membuka peluang pekerjaan kepada penduduk, bahkan meningkatkan kemajuan aktiviti ekonomi.

Kelebihan ekonomi digital dapat mencegah pengubahan wang haram, aktiviti rasuah di pasaran dan menjadikan ekonomi lebih telus serta berdaya saing.

Majoriti transaksi dan pembayaran dibuat menerusi platform dalam talian. Secara tidak langsung, ia anjakan para-

digma dalam mewujudkan ekonomi tanpa tunai ke arah ekonomi lebih makmur dan cekap.

Pertumbuhan ekonomi digital dibuktikan mempunyai hubungan signifikan dengan perkembangan, peningkatan dan pertumbuhan ekonomi yang secara langsung berkaitan teknologi digital serta teknologi mudah alih.

Pandemik COVID-19 dilihat memberi kesan memberangsangkan terhadap pertumbuhan ekonomi digital negara. Kebanyakan pengguna mengubah bentuk transaksi pembelian dan pembayaran daripada tunai kepada platform digital bagi mengelak risiko jangkitan wabak.

Sebagai langkah proaktif, Rangka Tindakan Ekonomi Digital Malaysia (MyDIGITAL) yang komprehensif dilancarkan kerajaan untuk dilaksanakan melalui tiga fasa sehingga 2030.

Pelan ini sebagai usaha berterusan bagi memperkasakan rakyat ke arah mahir digital dan pengupayaan perniagaan lebih kompetitif serta berdaya saing.

MyDIGITAL dijangka memberi lonjakan sumbangan ekonomi digital kepada Keluaran Dalam Negara Kasar (KDNGK) mencecah 22.6 peratus menjelang 2023.

Projek Jalinan Digital Negara (JENDELA) antara usaha memperkasa kesalinghubungan sedia ada dengan sasaran sembilan juta premis menjelang akhir 2025.

Usaha ini dijangka menjadikan negara ke arah teknologi selular 5G dalam masa terdekat.

Projek ini bukan sahaja mencipta lebih banyak peluang pekerjaan dalam pasaran buruh, bahkan sebagai pemangkin memacu pelaburan dalam inovasi baharu, sekali gus menjadikan Malaysia destinasi paling kompetitif di dunia.

Semua komponen dilancarkan menerusi MyDIGITAL diyakini mampu menjadi aset baharu kepada negara ke arah transformasi ekonomi digital.

Ia sekali gus memberi pelbagai rangsangan positif kepada peluang baharu, termasuk pelaburan digital dan pelengkap kepada dasar pembangunan negara seperti Rancangan Malaysia Ke-12 (RMKe-12) dan Wawasan Kemakmuran Bersama 2030.

Berdasarkan sumbangan besar dalam pembangunan ekonomi digital, ke-

rajaan juga memberi persetujuan untuk memupuk kerjasama lebih erat dalam bidang perdagangan dan pelaburan, termasuk berkaitan teknologi serta inovasi hasil pertemuan antara Menteri Luar Malaysia dan Arab Saudi.


Bagaimanapun, matlamat dan misi negara tidak mudah direalisasikan jika masih berhadapan pelbagai cabaran dan limitasi.

Usaha konsisten semua pihak amat perlu bagi memastikan jurang digital dapat dikurangkan dan semua lapisan masyarakat termasuk rakyat, industri dan agensi kerajaan menerima manfaat saksama.

Kesimpulannya, pelan dan dasar dirangka bukan suatu daya dan usaha mudah, tetapi semua lapisan rakyat Malaysia perlu cukup berani membuat perubahan bagi mencapai tahap maju dan peningkatan kualiti hidup.



Rohaiza
Kamis



Penulis adalah Pensyarah Kanan
Fakulti Pengurusan dan Perniagaan
Universiti Teknologi MARA (UiTM) Melaka